

Griaß Gott, ihr liabe Leit,
Herr Burgermoischta, Gau-, Orts- ond andere Vereinsva' treta
ond was es suscht an Prominenz no' geit.


En da letzta Ausschusssitzung hat da Chef eis gseit,
dass es fir de Wolfgang Metzger heit
a ganz besondere Ehrung geit.
Des staht ihm vom Alter her jetzt zua,
ond gschaffet hat er ja meh als gnuu.
Ond da dafür breicht's a Laudatio,
des g'hert sich so.
Da wars em Ausschuss uf oi'mal ganz still,
weil jeder des gern macha will.

Es han(d) sich schließlich a paar g'fonda,
dioa han sich fir dia Aufgab geschonda.
Als erstes han dia sich entschieda,
des wird auf Schwäbisch gschwätzt ond gschriebe,
weil bei dem Ma'(nn), bei alla Ehr,
hochdeitsch oi'fach it passend wär.
Ond dass ma' sowieso koi' „Etikette“ valetzt,
we'(nn) ma im Schwäbische Albverei' Schwäbisch schwätzt.

Da Horscht hat sei' Archiv umgraba,
hat überlegt, was kennt ma saga,
ond i sag ui Leit, da muaßt di' va'leida,
wenn ma so a Zuig will in Verse ei'kleida.
Ond wia des nach' klingt, „authentisch“, im Dorfer Dialekt,
des hau' i eahm nach' g'steckt.

Nach' (haben wir) hama g'hirnet hin und her,
was wichtig ond it wichtig wär,
denn bei so 'em (einem) umtriebige Ma' (nn),
wo fängst da a'(n)?
Der hat sei' Leba lang schwer g'schafft,
sich fir der Verei' ei'gesetzt mit alla Kraft.
Ob's au ohne ihn ging? Da wär i g'spannt.
Er ischt, auf neideitsch gseit, „systemrelevant.“

Was er zum Beispiel als Wanderführer tuat,
 isch vo de Benotung her „sehr guat“.
 B'sonders da Bodasee isch sein Revier,
 da kennt er sich inzwischa aus - ond wia –
 Vo Lindau bis zum Untersee



Steigt das Schif - flein in die Höh', ja Höh',
 Weil wir wan - dern gehn am Bo - den - see.

Zeema (zusammen) mit sei'm Team ischt er alles a'gloff,
 hat beim Vorwandra seine Entscheidung troffa.
 Hat alles dahoi(m) nach vorbereitet,
 hat da Bus b'stellt und a'(n) da richtig Parkplatz g'leitet.
 Vom Startplatz aus, `uf alle Fälle,
 geit `s a längere Runde fir dia ganz Schnelle.
 Fir dia andere, dia it so pressiera,
 brochene Rippa oda' suscht was kuriera,
 send d' Weg fast eba' ond leicht,
 damit ma it he' ischt, wenn ma's Ziel erreicht.
 Ond schließlich, des hat ma' no' nia vagessa,
 gahts zum Abschluss ebba na zu `em guata Essa.
 Ond wenn nach' au no' g'songa werd,
 nach' wird's so richtig sche':

(**bei** lauter Batenken ond Klee,
 i han ja koi Schätzele meh.)



bei lau - ter Ba-ten-



ken und Klee i han ja ko-i Schät - ze - le meh

Dia Bliatawanderung isch(t) an feshta Termin im April,
 den koiner vo' eis me missa will.

Ob's ohne de Wolfgang ging? Da wär i g'spannt.

Er ischt, wia scho' amal gseit, „systemrelevant.“

Em Herbst macht er nach' sein Moischta
als oberster der Riabagoischta.
Da fährt er auf d'Alb zum Riaba hola.
Dia sät sei Freind Manfred extra ei',
fir eis, fir da Dorfer Albverei'.
Nach' kommet sie g'strömet , Weib, Ma' ond Kend,
dass ma schier koin Platz meh zum Schaffa fend.
Da Wolfgang bringt (ihnen) eahna nach' bei, was es hoißt,
wenn ma` unterwegs ischt im O't als Riabagoischt.
Sia lernat an Spruch ond ängschtigat d'Leit,
dass recht viel Schok'lad und Guatsle geit.

Fir da heitige A'bad ha' m'r den Spruch nei' dichtet
Ond für die aktuelle Feia eing'richtet.
Jetzt (lasst) lon't amal hera , ihr Riabagoischta,
da Spruch über da Ober-Riabamoischta:

(mit dem Publikum einlernen)

*Mia send dia Riabegoischta,
ond hond an tolle Moischta.
dass ohne it gaht, des liegt `uf da Hand,
er ist für eis Goischta „systemrelevant“.*

Als Kassier ischt de Wolfgang da Finanzminista vo' eiser'm Verei'
Ond solange er des macht, (sind wir) send man no' nia pleite gsei.
Des läuft bei (ihm) ehm so im Hintagrund mit.
Geld hat ma' , davo' va'zählt ma oi'mal em Jahr,
suscht it.
Ond , i denk, des ischt ja bekannt,
da ischt **it** der Kassier,
sondern da Kassastand - „systemrelevant.“

En so' em Verei', wia mia oiner send,
gibt' s Poschta, dia ma' it en der Satzung fend.
Da Wolfgang hat glei zwoi davon,
mit viel Arbe't und ganz ohne Mindestloh' (n).
An erschta Stell tuat er älls fotografiere,
da springt er beim Wandra hindre und firre,
damit er älle gut v'rdwischt
ond koina schiach uf 'm Foto ischt.
Nach rennt er in d'Wies nei fir a nuis Motiv,
Gräsle und Blämla (Blümchen) für sei' Fotoarchiv.
Amal ischt er da, ond grad wieder weg;
a Intervalltraining ischt dagega a Dreck.
Au' beim Fahrradfahra ischt er gern Fotograf,
umschwärmt dia Radler wia a Hond seine Schaf.
Erscht strampelt er vorn und nach wieder henda,
wa' tuat der Ma' sich da jedesmal schenda.
Dahoi' legt er nach' am Computer los.
I' frag mi', wann macht er des alles bloß?

Aber eis Wander- ond Radlerleit
macht er natirlich a große Freid,
wenn mia em Netz eis angucka kenna,
wia ma' durch d' Hoimat rolla' und renna'.

Ond wellet /(wollt) ihr wissa,
was da Wolfgang no' ischt?
Er ischt eiser Vereinsjournalist!
In d' Schwäbische, ins Mitteilungsblatt
schreibt er schwarz uf weiß,
was sich so ereignet bei eis.
Ond au im Blättle vom Hauptverei'
stellt er seine Artikel 'nei,
damit au' dia a Ahnung hond,
was dia en dem Dorf a'n da Dona dont.

Ja, ohne de Wolfgang wär'n mia em Netz bloß spärlich,
in der Presse überhaupt it bekannt.
A bissle ischt er au da „systemrelevant“.

Wa' tät a berühmta Ma'(nn), des wisset ihr au',
ohne, so seid ma' doch , ohne sei Frau.
Drum bringet mir jetzt , des ghert sich so,
no' a ku'ze Laudatia zur Laudatio.
Des hat ma schon in biblische Zeita g'macht,
da stah gschriebe, was a guate Frau ausmacht,
ond wie rar dia send:
A tichtige Frau, ob ma so oine fend ?
Des wär dann a Fang.
Oine, dia ehm guat tut sei Leba lang,
liab ond schaffig ond Tag ond Nacht fleißig.
Stah alles in Sprüche, hinter Kapitel 30.
Liaba Wolfgang, mir denket, des wirst Du wohl wissa,
mit deiner Christel bist ganz g'wieß it --- schleacht dra',
du bischt a beneidenswerta Ma'.
Sia isch fir di' ond Ihr send firanand
-auf neideitsch gseid - „systemrelevant.“

Zum Schluss' hond mir eis überlegt,
wia so a Laudatio `em Wolfgang s' Herz bewegt.
Wahrscheinlich denkt er – ja, spinnat dia,
wa vazehlat dia auf fir a Zuig vo mia,
so viel Lob ka`scht ja schier it va'traga.
Ond nach' tät er vielleicht ganz oinfach saga:
`s zeema schaffa isch mei Deng gsei,
oina alloi isch koi' Verei'.
Mir send alle zeema, des isch doch bekannt,
a jeda `uf sei' Weis „systemrelevant“.
Z'letzt
hand m'r eis no' amal zeema g'setzt,
ond iberlegt,
wia ma', in Bezug uf die Ehrung heit',
„systemrelevant“ auf Schwäbisch(sagt) seit:
„systemrelevant“ hoißt auf schwäbisch, sag i'(ch):
Wolfgang, wa' tät m'r au ohne di'.